

**2 Timoti
 Polva Timotimba Omnana,
 Kamba Doa Murapeta Dahalm
 Vev, Hona Andrava Si Kava Yena
 Englisra Holothovav.**

1-2 Kava Pol, kava hona tombaimomba novol vipipramnav yem Timotim, kava yemba mindnam und vev, kavna ombolnonoamsna. Sesoaa kamba hev pusvundthoana Yesus Kristusna moalamangnindrinielm. Sesoava kamba pusvundthoanamba, wo himba kamba omnana, yeoa moaoa wulluhungu vinvm hindm hindm, nemelwevsanam alm. Wo nonamba himba si Yesus Kristusna nemeltindilmba avrava, himba si nemelundna Yesus Kristusnana avav. Sesoava ovlahinv hemba os. Sesoaa ara, eva Yesus Kristus yemba undalm ehevra, eva beswonam wavra ehevhomnavra, wo yimba beswonam undwonam noinda avav.

Polva Suwenamendna Orevna Timotim.

3 Kava kavna sembayangdava yemba putpi-alohvmoa owaimomolva sia okomba. Wo kav vev, omnnav Sesoam, yimba lehra venav hemba, hona sembayangdava. Himba Sesoa kana sim-behumunna eindhmunna sembayang vinivna hemba. Wo eva osoa kava hem andra venavta, kav nom nonglavm, os ov, memba lehra.

4 Kava os nengawov, yimba wenamba kainda avna. Wo kava nengv mindnam hevm os i, yemba nonglalmba, wo osva kava indk vethavav.

5 Kava yena undmba tanam nengmanav. Nomba sna undva, seilva yena ongapevna Loisna lohna, eva pevna avapevna Yunisna. Wo os kava nengv, yimba nona sna undnamba lohv.

6 Memba honamba kava hengava yenamba nengavnangmba owiliha-phovpa, nonam andra velm, andra noi ten Sesoaa pevm vraohnam. Sesoaa yemba vraohna nomba andrava, nonamba kava englava kavnamba holowohavnamba yeindava. Doa taiha vevra, os ora, suwemda tavrakili-havongo vev.

7 Sesoava pimba hevsongolkoklava daswolnamoa, osmba noinda pem vivra. Himba pimba daswolna hevsongolnana, wo pimba noinda nonapopolva av keknamba, wo pimba indhanamba monglamba und vowel viv, wo pimba pivmba eukho vevra.

8 Wo noinda osva manam yimba lousva vevra, ishunilmба indhanamba pivna mendekli Yesus Kristusmomba. Wo eva manam yimba kanapenamba lousva vevra. Tanam kava buinindrini mendeklina. Heva os hona kinmba kava vrv, hena besal nemelmonana. Wo noinda osva yeoa kam pethamno, honam kinm vralm, manara, Sesoava pimba suwenanovnamangas loihanga towandmangas wolana, honamba velmba.

9 Sesoava pimba lopshanamba, hevtindilm kekaiv vena. Memba noindava owai, manimani memba pimba pivpa vivpa, heva os noinda nom, hev ten nengvm, eva noinda hev ten pim undalm vowel vena. Nomba hevna undva pimba temba nonamba daswolnamba Yesus Kristusnanamba, nonamba manimani suvevnamoia mendah.

10 Wo sismba pivna mendekli Kristus Yesus prunna, wo noinda osva, mani eva pimba shaluhunna, novnamba nonglalmba Sesoana undmba. Yesus Kristusva suwemsna muengna pina dalalmба. Manara noinda, pimba si dalvrava, henga phosohvra. Wo besal nemelmonana himba pimba novpa wuleihinv monamba, no undnam alm, osm owai, es eva mueisowa vevav.

11 Kamba doa kikih vrena, ishomana vinilm nomba besal nemelmomba, eva moalamangnidrinielm guruwolm.

12 Wo doa daipotava kava kinwondava ilohv, noinda kava ishunvm besal nemelmom. Heva os kava lou vevmoa. Kava louhui, manara, kava wiyera lohmanav Yesusmba, hemba kava keknamba undnahonamba lohmanavpa. Wo vei, os kava nengv, himba si kekalvho vewol vevra nomba manimani, himba temba kaindava slowothonamba, heva verava, no nambai phora.

13 Keknam wohengvm moanonoam, pev ten hellevnam kanamini. Engvm, osm ovra, os avm, pioa undnahonam keknam hemoa amnavra, indhanam monglam nesmos vewol vivra, men piv avm Yesus Kristusinda.

14 Yeoa dandana vrevm moanonoam, nomoa temba kava yemba ishomnanamba. Dandana vrevm Sesoasongolnapopol, henoi ten eungu vinvm pivinda.

15 Yimba nonora lohv, osva doa doara kamba dasvo buona Asiapethanindva, eva hona tendorinisambla Pikelusi Hermokenesi.

16 Kava sembayang vev, osm mendekliva si wavra vrowol vevra Onesiporus tatanamba.

Himba elsus kamba kolvralohvna, himba louva velohvnamoa, osva kamba omnavna, buimera av, owai.

¹⁷ Himba nonamba provnamba Romba, himba kamba keknam silelvna, venamba, kamba nonglana.

¹⁸ Kava sembayang vev, osm mendekliva si wolaihavav Onesiporusmba hevna wavrarava, no nambainamba wetatmorava eksuwulvrava. Yimba nonora lohv, kamba lunit luthuwulana Onesiporusva diva Evesusrava.

2

Timoti, Yeoa Besal Valgonindriniimsna Loho Yesus Kristusna.

¹ Yimba kana ombolnihilnonoamsna lohv. Elsus yeoa wohlohv m Yesus Kristusna wavrakolana.

² Vena, pev eva annind annind doa yimba hil-lina, nonamba kava numhowol vevnamba. Wo eva yeoa no moana numhowol vevm monglamoia indhanamoia, pev ovra, memba lehra himba honamba lohv. Wo himba eva osva vivrava, owalmba nona eishoraohvra.

³ Yeoa keknam monglaoa dawoho hona andraoa, kinmoa gualmoa kamongooa. Wohvevm, os ovra, Yesus Kristusna valgonindrininonoa.

⁴ Valgonindva viv, osm indk vethara kana kuwuloa honinda, wo noinda osva himba hevna nambaiva pilpiavmoa ombamba, osva temba monglava indhanamba vivpa.

⁵ Wo eva osta, nomba windetatanonoanindriniva dandwonam alahmana vev, himba temura wohengvra moamba, osmba ka

kuvhoawol vera. Owai vellava, si himba owolakohavav, hevna topi moainalmba vralmba.

6 Wo eva osta, osondranindriniva himba nomba lotholohollava osondrarava, henoisna miva si nevra nomba innemba, temba hevpa wolanamba.

7 Honamo keknam nengvm, memba honamba kava ishovpa. Mendekliva si yemba pueuvelavav, keknamba nengalmba, osmba manam manam temuramba levrapivongolmba.

8 Elsus nengaomanavm Yesus Kristusmoa. Himba lohv Devittindirini. Yesusmba dahanamba boasna, wo himba henga phona pokamariniva. Honamba memba besal nemelmoa honana kava numhowol vev,

9 wo kava kinm alhy, noinda no besal nemelmora. Eva osva kamba ningivna wenamba kelsombovhonindriniimsnamba. Wo heva os Sesoana moamba wenamba ningilvmoa.

10 Wo ambo heva kava kavmba piapahavra otollinimsna, vralmba kinmba. Kava wohhev honamba, osra nomba Sesoava temba kikih vewol venamba hevtindilm, heoa beswonam ara, nona Yesus Kristusindaoa. Wo himba si avra hemongova beswonamangas yunalm yunalm.

11 Moamba memba tanamolnam, Pimba dalvrava hemongova, wo pivva si osoa henga hemongo aevulvrata mongawulm.

12 Heva os pimba sambla undnamba amnatava, omnalmba hemba, eva himba si os sambla und verombwolvrata, pimba unilmba.

13 Pimba keknamba undnahonamba amba owai vetava, himba hevpa si yunalm wohengvra hevna moamba, manara noinda

himba hevmba es eva dasalmba weihaloh vrevra.

Timoti Yeoa Andraoa Keknam Vevm, Sesoana Andranindrinielm Loholm.

¹⁴ Hona moaoa yunalm osangas wohlotholohvra, wo ongawolvm indhanamoa Sesoana novra, ata alhuvm ombamora homeis. Sna moarava alhollava, nomba moamba owaimomolmba mongomba kolvravavmoa, nomba ambo indkokla vewol vev, nom henoi ten hillivm.

¹⁵ Yeoa hevm besal andranindrinielm lohvm, wo nomba Sesoava vravra, eva pevmoa wohwiraohvm nihnahanam Sesoam. Andranindrini ehlapuvral loho, snal os owai, louva hemba eilh vrevra hevna andrarava. Sna andranindrini loho, noi himba vevrav moanonoava besalmonamangas.

¹⁶ Indanam ehalla vinvm nonapenamoa, himba temba ningewol pawolmomba sislia vrivpa. Nomba sna moamba si indhanamba wonsihavra esvema Sesoanaminiva.

¹⁷ Nomba moangakalamomba si pomsna selelevhoangavav, os maim ora, uvavul nihmerini. Himeneusiva Piletusiva sna indhanarinisambla elohv.

¹⁸ Himba moanonoava doa doara pelmai evethana. Himba os ohona, indkumbiva indhanamba doa phosohna pokamariniva, hengava sismba si phosohvavmoa. Wo no sambla indhanamba indkumbina undnahonam keknam almba paslasal vewol ohovunvna.

¹⁹ Wo heva os Sesoana bolvol boalgalva osangas wohlotholohv keknam, wo moamba honamba di noinda novol velohv boalgalsra,

Wo mendekliva nongalv, osva ov, himba nomba
memba kana.

Namba 16:5

Wo eva osoa novol velohvta, indkumbiva nomba
temba osva uvpa, kava keknam amnav mendek-
limba, doa heoa wuleihivra sahoklamoa.

20 Di mongo deuvmendeklira wo manimani
nomba nalohvpa, hevm nonangas vowel vina
golna, silvana. Wo eva monglava nona ve-
wol vina, vena, tina, eva sembpethana. Wo
nomba dumbvpa monglava, heva mana vema
mendekli andraramangas, ombandraramba noi
mongla dumbv, honi dumbv tina, sembpethana.

21 Himba nomba hevmba posvetava neme-
lalmba no monakoklariniva, hemba nomba si
osva moainal mendekli andrarava waisaivvav.
Wo himba si dendalva ora lohvra, wo mendek-
liva si osva hemba ovoovravra andraramba. Wo
himba si ambo plasra lohvra, besal andraman-
gasm velm.

22 Wo noinda osva yeoa ehalla vevm, no nen-
gavnangkoklanapenamoa, temba vrivpa tendo-
towondva. Keknam lehvm, honana loholm,
beswonam alm, keknam undnahonam loholm,
nesmos vowel velm, eva windewonam alm. Ho-
nana loho, mongawulm moakot velm hindmon-
gom, nom ten noi he sembayang vinivm mendek-
lim, mana vema hem sahoklal kethawolhui.

23 Wo manam yimba hillinvra no ningewol pa-
wolmomba. Manara, yimba nonora av, osva sna
moakoklarava os ovona, si verava, mendekli vera
daosmolm.

24 Mendeklina andranindrini, manam yimba
velanongla vowel ovoav. Yeo luhunvra besal
indhanariniangas indkumbimoa. Yeo lohvra be-

sal guruwolmangas. Yeo a indhanarini windelalm wohlohvpm.

²⁵ Mendeklina andranindrinioa ambo taiwwonam numhowol vevra hemnomoa, temba himba yemongova hona moarava ahnamba lovahwolvpa. Sesoainda ambo temba lohv, heva hev verava, ora weihaloh vewol vinv indm, osm saivra moanonoaram.

²⁶ Setan doa engla sheinna hemba, wo newond vewol vena, nom velm manam manam, hev ten nengvm. Wo heva os himba hengava moanonoamba nengvhoallava, himba osva hevmba kilumbshuapravav Setanna newondriniva.

3

Ovi Pethai Imhara Evhowlvram.

¹ Honam nengo os, si indkokla ongolohvav, non-amba ovi pethaiva imhara evhowlvra.

² Wo nonamba indhanamba si hevmangas nesmos avramana vevra, eva dimangas und vivra. Himba si os vivra, vevra, hevmba uvra, kangasta, eva helvatatohluhul avramana vevra netesnalm. Himba si eishunvra monglamba wankenlusmona owalmba. Himba si hilwilvramoa hevna araravalmba. Himba si onengvhunvavmoa hengava nomba indhanamba, temba hemba enesmos vewol vivpa. Wo nomba indhanamba si snamba avramoa, Sesoava hevpa temba nengvpa.

³ Himba si owai, avramoa, nesmos vewolalmba monglamba. Himba si sambla und vruuwlvra, maisasa vewolalmba owalna indkoklamba, wo si eishovra moakoklana. Himba hevmba si beswonamba naengho vewol vivramoa. Himba si

und wohvivra osmangas, eva si ovunvra nomba manam manam besalmba.

⁴ Wo oviva pethaiva imhara evhowolvava, indhanamba si nonam emusk vovhoawolvra owalmongova hevmba. Ningvramoa manimani, himba nonamba si os wulluhkaka vevra. Himba si kuvhoawolalmangas vivra, eva netesnalm helvatatohluhulm. Himba si undva vrivra nomangas, ovra, honinda ata kava beswonamba undva lothopravav lehrava. Himba owaimomolva si Sesoamba undva vivramoa.

⁵ Himba si os wohvivra, ovra, kava andra viniv Sesoam, heva os owai, himba si tanamba andra vinivramoa Sesoamba. Wo yeoa indiasvhō vinvm no indhanaindaoa.

⁶ Gurukoklava monglava viv, deuvra evongok-iluwihinv, wo ungevlim weihaloh vowel viv, osm heoa kamangas patvunvra, honam men ka vivm. Nomba ungevliva nowolkoklana av, wo himba mendah sikulmonam sahonam av.

⁷ Wo heva os nomba ungevliva himba elsus lehalvohv, nemelmonba hellelmba, wo heva os owai, beswonamba temurava levrapivolymoa moanonoamba mindnamba.

⁸ Hona gurukoklava ovuv moanonoamba, memba honamba os ten Yanesi Yambresi evennanam Mosesm. Himba temba sna indhana, hena nengavnangva sambla lohulinv. Hembā doa nihnahonam wohplel vena, engalmba moanonoamba

⁹ Wo heva os si nomba gurukoklamba nonamba kanandhawol vevavmoa, temba hevpa vilangavpa. Wo Kristusnindva indkumbiva si nungeilvav hembā, osva ora, nengavnangva henamba indanam puvleinv. Os vinna honamba Yanesimba

Yambresimba, Israelnindna novra.

Keknam Wohkek Vetho Sesoana Moamoa.

10 Yimba kamba temura wohlihav, kava sna undnamba. Yimba hellevna, nomba kava numhowol vevnamba, wo eva kava kavpa os avna. Yimba nonora lohv, kava keknam lohmanavna Sesoamba, wo kava kavmba piapahavna, indhanam monglam und vewol vevna. Yimba nonora lohv, kava duuswonamba vevnamoa, nonamba kava kinmba lopsho vrevnamba, wo eva kava kivrawuliha vrevnamoa.

11 Yimba nonora lohv, osva kamba vendawuvmona vevna, wo kinmba sna kamba ovongomnavna i. Yimba nonora lohv, honamba kamba di vungamnanam Antiokra, Aikoniamra, eva di Listrara. Yimba nonora, no kembellava kava kinmba sna dombgavna i. Wo heva os mendekli kamba lopsлаhaomana vevna no kindava.

12 Tanam, indkumbiva Yesus Kristusindava almba vevrava, osva temba Sesoava nengvpa, hemba si nomba indkokla vewol vivra.

13 Indhanakokla noi kelsombovhol, eva indhana mongla sahoklal, si hemba wohindkokla vilovav. Himba si wonsaivra monglamba, wo heva os himba si vivra hevnahonam.

14 Heva os yeoa wohkevro keknam moam, nom pev ten numhowol venam. Yimba nonora, honamba moamba memba tanam. Manara, noinda yimba lihawol vev kamba, temba kava yemba numhowol vivnamba.

15 Yimba doa levrapivongona Sesoana doaramini tombaimomba, eusil doara, venamba, daipota. Honamba Sesoana doaramini

tombaimomba yemba wulalm vev, osm verava, ambo nongapala vevra nowolla. Wo nomba besal nowolva mona vuenghav, osm Sesoava yemba lopshav monakoklariniva Yesus Kristusnana.

¹⁶ Memba honamba tombaimomba doaraminiva, Sesoasongol hev daswolvna, wo hevm mendekli, eva hehuiva es vivav. Vev, nonam numhowolalm moanonoanam, eva ishunilm indhanam, osm ovra, noi indkokla vowel viv yimba. Sesoamomba mendekli, osm oi, wulgupuv vrei sahonamba, nona shishona vriv, wo eva numhowol vivra, osm ora, os ao beswonamoa Sesoana novraaoa.

¹⁷ Vigm doaramini tombaimonana, indhanariniva mongova andra venatava Sesoamba, himba si plasra avra, wo si sahvavmoa mana vemamba, nonamba velmba besalandramba.

4

Yeoa Wohhoanavho Vrungao Sesoana Andramoa.

¹ Vei, Sesoa, eva Yesus Kristus, hena novra, kava hona moamba yemba vraohv. Yesus Kristus he si helmhola vowel vevav indhanamba, nomba vei, mendah men avm, eva ten sihavniam. Himba henga si provav homba, wo king kuwulalm wohloholm yunalm. Wo kava honi men moamba yemba vraohv.

² Wo noinda osva yeoa keknam wohloho, ishomana vinilmoa besalnemelmomoa. Yimba ambo osangas plasra aka vevra elsusva. Osva ovra, himba nomba hellemba owai viv, eva osva ovra, himba nomba hellelm viv. Novnavhora

numhowol vevm, heva os taiwwonam ambo. Ishunvm indhanamo, nom hev ten ningvm velm, ishunvm, nonamba himba indkokla vivnamba, wo suwenamandna vowel ovovm hemoa.

³ Manara, nambaiva si provav, nonamba indhanamba si aongpup vivra, Sesoana moanonoamba hellelmba. Himba si etapewolvra esvema sowotalm gurumba, os hen i hena und noinda beswonam lovhoaprinv, guruva nomba os eishov, manam manam kava hellelm viv.

⁴ Himba si wuleihivav, hellelmba moanonoamba. Doa himba si vivra osoa, doa wohengivra moangakalamom.

⁵ Wo heva os yeoa pevmoa temura vrevm nonam. Nonam nonam kinmba ovra profram, ambo dombongas vevm. Besal nemelmondra vevm. Manimani vevm, nooa Sesoana andranindrini.

⁶ Kava kavmba ambo engla wulihawolvna, ni-hnahonam wuraholmba Sesoamba. Doa nambaiva promnav, kamba murapeta englam wuleihawlalm, vevand velav, pholmangas. Kamba doa murapeta dahalmba vev. Kanamba tovolva si gavav, os ora, Sesoam wainpolna sembayang viniv sengra.

⁷ Kava daosna laus vrena besalmba. Kava doa vipiana dandwonamba. Kava keknam wohlohv undnahonamba mendah.

⁸ Doa mana vema besal kamba diva kokolma velohmanav. Memba osm, Sesoava kamba si omnavav, yimba lehra indhanarini windel. Sesoa helmholva vowel vev, hengas beswonamba helmhola vowel vev, wo himba si nonam manimani kamba novoa venavav.

Himba si kamangasva dombraohvavmoa, no hindnahonam, henoi hem ten und vivm, wo nengviluwuv, hem prolm hengam.

Timoti Yem Pevm.

⁹ Yeva nungi lelnam kaindamoa pro.

¹⁰ Manara, Demasva mindnam und vevna hona pethamba. Wo himba doa kam bumb velahangana honaminiva Tesalonaikaram. Kresensva gana Galesia provinsram, eva Titusva Dalmesia provinsram gana.

¹¹ Memba huiva kava Lukm mongasalm waiav. Omnarava Makm, waipro, yimba provrava. Himba si kam kolvravav hona kavna andrara men hui.

¹² Tikikusmba kava doa wolaihangana Evesus-ram.

¹³ Kava temba Troasva anamba, kava di moan velaphaphona kavna bayu tokolva Karpusna deuvra. Wo yimba provrava, nonamba kana moan vilpro hom. Kana veo, tombai dombo, ata ye mai vevav nom tombaim, ten tatatovna vinam, temura ipro.

¹⁴ Aleksanda himba manam manam besina ve-wol vevna, himba kamba mindnam wohindkokla vrena. Sesoa si hemba nengpong vrevav, noindava memba vowel vevpa himba.

¹⁵ Eva yeoa ambo novkalana vevm, ata homeis yem eva indkokla vrevm. Hemba mindnam oholvohv, pelekopala vowel ovolmba moamba pinamba.

¹⁶ Kava seilmangas Sisa duangna moamba opla vremnana, kavmba dandana vrelmba, mongova kamba okolvranamo. Indkumbiva kamba ambo bumb velaha angana wondakolamsna. Wo kava

sembayang venavna Sesoamba, os homeis, yeoa hena indkoklamoa maivethinu, nomba temba himba kamba vinivpa.

¹⁷ Wo heva os mendekli kamba waiav. Himba kamba pundind vihana, osm kava osva beswonam ishomana vinyra besalnemelmomba Yutanindna meisungundmba. Mendekliva ninginv Yutanindna meisungundmba, osm hillira heoa evata. Wo noinda osva kava laionna mengmerinimsna nongovoanoa.

¹⁸ Mendekli si kamba lopslahavav, nonamba indkumbiva kamba sahonamba vinivrava. Mendekliva si kamba beswonam waingavav hevna senakembellam, hev ten vaohotho wulavm. Pioa hena nihilmoa elsus wulovolvumona velohmanara osangas yunalm.

Eunillam Sehmoa.

¹⁹ Kana sehmoa dombtreihunu Prisilaim Akwilaim, eva Onesiporustatanam.

²⁰ Erastusva mendah av di Korinda. Wo kava velahaprona uvavulmungil Tropimusva di Miletus kotara.

²¹ Wo noinda osva yeva nungi lelnam pro kaindamoa, namvuvinamba tepepenamba dandm poshev yenamba. Vena, Yupulus hev, Putens, Linus, Klotia, wo eva indkumbi Kristusnind, himba yemba sehmoa piambmanav.

²² Mendeklio yemoa waiavra, wo eva heoa yemoa wavra vewol vevra elsusoa. Doata.

**Sesoana Besal Nemelmoa Walsana Moana
Genesis, Ruth, Jonah, and The New Testament in the
Waris Language, also called the Walsa Language, of
Papua New Guinea**
**Buk Stat, Rut, Jona, na Nupela Testamen long tokples
Waris long Niugini**

Copyright © 2002 The Bible Society of Papua New Guinea

Language: Walsa/Waris (Waris)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 18 Apr 2025 from source files dated 31 Aug 2023

81136742-8dfd-57f5-95ae-cd3afb267b0d